

La Chouette,
oyseau sacré à
Pallas.

noyes qu'on y faisoit, ou pour le moins la choüette, oyseau consacré à icelle Pallas, desquelles mōnoyes i'espere qu'on en verra bon nombre, exprimees & exposees en ces beaux liures de medalles Grecques, que le gentil Goltzius promet de mettre bien tost en lumiere : entre lesquelles ne sera omise, comme i'estime, la declaration du present reuers de ceste nostre medalle, auquel vous voyez ce Lyon tant bien faict, avec l'inscription Grecque, dont les premieres lettres sont effacees : qui a esté cause que ie n'ay sceu venir à l'intelligence de la diction Grecque, pour n'auoir point veu d'autres medalles de pareil reuers, où l'inscription fust entiere, & non fruste & du tout effacee. Aucuns veulent lire *Hylitōn*, entendans ceste mōnoye auoir esté faite par tels peuples, à sçauoir, nommez Hyeles, desquels il ne me souuient aucuns autheurs auoir parlé. Bien sçay-ie que Strabo fait mention d'une ville d'Italie, nommee Hyela, anciennement construite par les Phocenses, peuples de la Grece.

Le second portrait de cestè table avec son reuers, est semblablement tiré d'une bien belle petite medalle d'argent que i'ay, pesant environ demie drachme Attique, ou autant qu'un *Quinarius* Romain, encore qu'elle soit medalle Grecque : laquelle pourra estre (comme i'espere) mise & declaree aux susdits liures des medalles Grecques de l'autheur cy dessus nommé : comme aussi la suyuantte & troisieme de ceste presente table.

Ceste troisieme medalle Grecque à l'habillement de teste, ressemblant aucunement à celuy que porte le Turc pour le iourdhuy, nommé *Tulbant* ou *Turban*, ainsi que voudrez.

Le reuers semble estre fait à plaisir, ayant un petit *Cupido*, ou marmouset, assis sur la croupe d'un cheual à face humaine. Entre mes medalles Grecques, le reuers d'un didrachme d'argent à l'inscription *Neopolitōn*, a l'effigie d'un taureau ayant face humaine, lequel on veut estre *Minotaurus*. Le cheual de *Iules Cesar* Dictateur, s'il est vray ce qu'on en a escrit, auoit les deux pieds de deuant semblables aux pieds de l'homme, & ainsi est effigié & colloqué deuant le temple de la deesse *Venus mere*, tesmoin *Pline* en son huitieme liure. L'*hippocentaurus* dont parle *Phlegon Trallian* seruiteur de l'Empereur *Adrian*, auoit les pieds de corne solide, & le crin comme les cheuaux : & toutesfois la face estoit semblable à la face humaine. Il fut enuoyé en *Egypte*, où il mourut par le chan-